

廣西名勝志

廣西名勝志

廣西名勝志

上海古籍書店復印

三冊 定價二十二元

三〇・一・三〇〇・七九・十

廣西名勝志卷之六 蕙風移

閩中曹學佺能


慶遠府

在府城西
南六百里

領州一縣四



秦屬象郡漢交趾日南二郡界後沒於蠻唐初招
降置粵州州有河為神龍所居天寶元年因改名
龍水郡乾元元年復為粵州乾符中更曰宜州宋
宣和元年陞慶遠軍節度更龍水曰宜山咸寧初
以寧宗潛邸陞慶遠府至今沿之其域相傳唐刺
史吳懷忠築國初洪武二十九年因設衛乃拓
開舊址合之得一千三百丈北以江為壕東西南



三面引官陂水為沼延袤二十餘丈又有鎮城在
府城北二里宋寶祐間築黃應德記 廢宜州貢
院在府城南宋時置元廢 南樓在府治前城南
門樓也有黃庭堅所書范滂傳刻石于上後嘉熙
三年樓燬刻併不存右魯直真蹟字徑數寸筆勢
飛動為趙忠定公汝愚所得寶篋笥每過名流
輒求題跋云 明遜國記載 建文帝既遜位削
髮披緇執楊應能度牒雲遊四方自湖蜀入湘至
廣西慶遠府寓西竺寺時有指揮彭英者先曾侍
衛或傳有異僧至英往訪之心知其為帝也嗚咽

不自勝饋蒸羊 帝起作偈繞而誦之乃食既登
舟英復多所贈獻 帝解所乘馬酬之復作偈曰
蹴路人間知幾年艱難險阻共周旋我今別爾東
西去何日相逢堯率天及解纜馬忽騰躍潛然而
斃多記近事 月山叢談四卷郡人李文鳳撰

宜山縣

附郭

唐龍水縣為宜州治宋嘉祐七年省洛曹縣入焉
宣和間改今名以有宜山在縣北二里龍江上江
源自貴州都勻府流至城北而東兩岸石筍孤峭
直下柳城合於融江 北山一名會仙山在城北

一里上有白龍洞洞有石龍鱗甲宛然唐末河東
陸禹臣嘗遇軒轅彌明授以仙術且曰子之成功
當在山窮水絕之處禹臣乃歷覽至宜寓吳生家
生師事之因與登覽歷遍大小巖穴凡二十所遂
居大巖修煉不復出手植異桃石榴歲久不凋後
屍解仙去又里許為天門山兩峰如削翠律參天
宋馮當世祖墳在焉其子孫所居曰馮村 南山
在城南五里山有洞軒敞如屋中有石龍鱗甲皆
具因名龍隱洞前有廣化寺宋真宗嘗賜御書十
六軸藏之闕中州有盧僧者名德洪自幼棲止于

寺一旦不知所之州守張自明建昌人寓京邸有一僧來謁自通其名與所居遂留之談出一履為券及自明至因遊南山問德洪所在眾僧愕然曰此僧別去不知所向久矣自明乃焚香祝曰汝如有靈引我以香已而香拂山背石室中隨往觀之有一竅燈光微明德洪坐化于內隻履在前正與所遺者為對九龍山在城西南六里山有石田高低井井洞口一潭深不可測張自明一日集諸士民言曰吾入關矣士民隨之詣此山入洞光景殊別有石碑題曰宋刺史丹霞張公之墓鐫磨若

宿構自明飄然而入洞口漸合今石門僅容一人
側身而進 日山在城東隔江九里其西有月山
距城二十五里皆以形肖而名古識云東有日山
西有月年年征戰無休歇賴得西水向東流世代
永無憂 香爐山屏風山在德勝鎮羊角山在河
池所俱屬府西 龍泉在城南二里泉湧僅一勺
然灌溉甚廣其水重于諸水黃魯直編管宜州暇
嘗秤之果然泉上有石橋舊名歐公橋山谷易之
曰龍濟橋 西事珥云黃魯直言余謫宜州半載
官司謂不當官舍乃抱被入宿於城南所僦舍一

上無雨蓋下無風障市聲喧聒人以為不堪余以
本農使不從進士籍仕宦則田間廬舍正亦如是
亦何所苦也 馮京本宜山人父商寓鐔津往來
江夏遂占籍鄂州京中三元仕太子少師致政今
尚有三元祠在學內 區革宜州人與黃魯直友
善後為瓊州理魯直送以詩有送子之官瓊海上
鯨吞舟楫蜃樓虛之句 何旦宜州人嘗為海南
都巡簡使與蘇軾遊多得其筆跡還家橐中一亡
所有親識或嘲之旦出所藏軾書示之曰此海外
奇珍也人服其風尚 趙抃衢州人慶曆中為宜

州別駕愛民如子尤加意士類暇則集諸生會于
香山梵宇相與講明有一戍卒誤殺人法當死方
繫獄病疽未潰牒使醫療之得不死尋會赦免其
愛人之周類此 俞若著崇寧間判宜州時黃魯
直謫居黨禁甚嚴士夫削軌掃跡若著獨為經理
舍館敬禮彌至又遣二子相從時論嘉之 南渡
乾道八年舒璘字元質通判宜州謂所知曰敝床
疏席總是佳趣櫛風沐雨反以美境璘浙江奉化
人 張自明字誠子以宜州教授攝州事崇重教
化創龍溪書院課士其中士風為之易嚮又新黃

太史祠而自為記略曰初度地有細民宅其旁夢
有人云此非汝所得居亟尸之及鳩工祠旁又一
民夢曰汝輩勿汙此坎屋陰地數尺有器以錫汝
民如言坎地得一古磬云 通志載宜州吳某妻
鄧氏其夫在戎所鄧以衣寄之而值以一絕云欲
寄寒衣上帝都連宵裁剪眼模糊可憐寬窄無人
試淚逐西風洒去途題畫菊云良工妙手恁安排
筆底移來紙上栽葉綠花黃長自媚等閒那與蝶
蜂來

天河縣

在府北
九十里

輿地廣記云唐興州同置宋大觀元年隸融州靖
康元年改隸宜州 北陵山在縣西二十里麓有
泉水里人有吳生者師事陸仙翁脩道於此 三
潮水在縣西十一里一日三潮潮退則其流一線
可以溉田因名聖水 湘山寺在縣城北宋時建

河池州

在府西二
百十五里

領縣二

本唐羈縻智州之地宋初置河池縣隸宜州省富
力縣入焉大觀元年於此置庭州以縣為懷德縣
隸之四年廢庭州其懷德縣復為河池縣隸宜州
元因之我 國朝洪武初省三旺州入焉弘治間

陞為州 英山在州前其下即秀江也智州山在
州西四十里綿亘百餘里舊智州治設此 金城
江在州東五十里舊金城州以此為名太平山在
金城江次巖上鐫天下太平四字 西事珥云河
池州近山地牧童十餘人群聚歌舞或吹笛戲方
劇忽山半一人約長二丈面濶三尺餘披髮烏喙
背有二翼俯觀群童為樂嬉然而笑垂舌長過腹
羣童顧見大驚皆反走其人能夷語呼曰合合勿
去仍歌舞吹笛以樂群童復聚吹笛歌舞如故其
人喜拊手大笑聲震林樾已而垂舌久之始去

思恩縣

在州西一百五十里

廣記云唐貞觀十二年開生蠻與環州同置因屬焉後州沒於蠻宋熙寧八年以環州思恩隸宜州我弘治間改今屬寒山在縣南五里土人謂之寒坂以山高多風炎方之人甚宜之緝山在縣北二十里土人謂之暗嶺以其山嶂崇疊日光少見故名石巖洞在縣東二十里三峰之下天成巖穴寬約五六丈有泉自穴中湧出環江在縣南六里唐環州治也帶溪在縣北四十里源出荔波至此旋流如帶入洞龍江宋之帶溪塞設焉又

十里為婆婆泉其泉常隱不見過行者渴而求飲則湧出寔名婆婆泉

荔波縣

在州西北百八十里

宋置荔波州以羈縻蠻人元因之屬南丹安撫司國朝洪武初廢入思恩縣十七年復析置荔波縣隸府正統十二年改隸南丹尋復金屬方林山在縣北五里水巖山在縣西十里其下有水從巖中出勞村江在縣東南一百二十里志云思恩荔波二縣西北界上與貴州爛土黎平諸夷相接不通王化有美杉生山下山頽覆壓不知幾

千百年矣夷云是諸葛丞相伐而理之雖未盡然
要亦兩漢先秦時物也夷人每候其地有紫氣上
騰則群聚穿土輒得之紫色堅類牛角投於水即
沈解為棺出市之